

Museo Arqueologico Aruba y su trabao tocante sitio y materialnan arqueologico

Enberdad area pa Ritz Carlton ta un area arqueologico

Museo Arqueologico Aruba (MAA) tin como meta pa conserva, preserva y investiga sitio- y materialnan arqueologico di Aruba y pa informa y educa publico en general tocante e arqueologia y historia Indigena di Aruba.

Mescos cu museonan na tur otro pais na mundo, MAA tin cu traha segun ley. Enberdad ta cu na Aruba te ainda no tin ley cu ta protege nos herencia cultural arqueologico debidamente. Pero tin procedura cu MAA ta sigui pa tog protege nos patrimonio cultural. Esaki kiermen cu MAA entre otro ta duna conseho na - y ta traha hunto cu diferente instancia y departamento di gobierno pa asina yega na proteccion di e sitionan arqueologico di Aruba cu, a base di investigacionnan haci y criterio specifico, tin mas prioridad. Como ehempel por duna cu asina a logra cu gran parti di e sitio arqueologico na Tanki Flip ta ser conserva. Pa e proyecto aki hasta ta haci uso di entre otro cambio di tereno, pa cual Departamento di Infraestructura (DIP) ta cooperando cu MAA. Den cuadro di e plan di ordenanza

teritorial, MAA ta duna conseho na DIP y Kadaster tocante ubicacion di sitionan arqueologico y esnan cu tin prioridad di proteccion. Te awor tin 182 sitio arqueologico cu ta conoci na MAA. Den esaki MAA ta haci distincion den importancia y tipo di sitio.

Encuanto e sitio arqueologico situa na e tereno unda Hotel Ritz Carlton lo ser construi, por bisa cu Museo Arqueologico Aruba na diferente ocasion a duna informacion y conseho tocante e sitio arqueologico aki. Tambe a duna conseho y informacion tocante gran parti di e mesun area di "high rise" hotel aki caminda tin mas sitio arqueologico cu ta ser menaza pa construccion di entre otro centronan comercial y condominiums. Pero mescos cu na tur otro parti na mundo, no ta museonan tin e ultimo decision.